

摛藻堂四庫全書薈要

集部

欽定四庫全書薈要

集部

四明文獻集卷四

詳校官助教臣謝登雋



欽定四庫全書蒼要卷一萬五千九百九十五

真部

四明文獻集卷四

宋 王應麟 撰

制

昭慶軍承宣使左金吾衛大將軍荆湖北路安撫副使兼知鄂州授寧武軍節度使龍神衛四廂都指揮使夔路安撫使兼知夔州兼提領措置屯田兼控扼瀘敘昌合四州邊面加食邑食

實封制

詞科試中第一場首選

門下建齋旄而啟鎮密聯廂部之班分帥閫以留田兼  
飭邊城之備乃睠承流之雋夙參宅牧之權兵農方急  
於坤維表裏載更於師律王言作命士聽無譁某官某  
沈毅而善謀忠純而知義臨機料敵明四種之兵書御  
衆牧人備五材之將略率先爪士屢奏膚公有嘉衛社  
之勤寔服執金之職貳荊州之方面江界肅清殿鄂渚  
之雄藩民心靖謐治效已聞於南紀朕衷尤軫於西陲

念蜀道之孔艱恃夔門之堅守遠連夷徼先江陽燹水  
之捍防近護風寒謹昌元巴川之控禦欲整軍而經武  
必徹土以峙張惟爾之能敵王所愾是用易苔雪宣風  
之秩新葭萌賜節之儀十乘以先啟行植中權之牙蠹  
四鄰若防制水壯列郡之喉襟繇副帥以褒升進上游  
而綏撫畀端拱使名之寵總紹興穡事之綱敵可勝而  
奏屯田亟上便宜之十二蠶來威而伐獬狁往陳師旅  
之三千欽哉實畝以實墉於以維藩而維翰申陪采賦

增賁戎昭於戲按德裕南道之圖慨想籌邊習農之績  
覽孔明平沙之陳毋忘渡瀘耕渭之規務本所以省轉  
輸設險所以嚴保障祇若予訓式固爾猷可授云云主  
者施行按詞學指南云唐虞至周皆曰命秦政命為制漢因之下書有四而制書次焉其文曰制詔三  
公顏師古謂為制度之命唐王言有七其二曰制書大  
除授用之學士初入院試制書批荅共三篇此試制之  
始制用四六以便宣讀宋知制誥名試中書  
而後除不試號為異禮所以試者觀其敏也

特進觀文殿大學士提舉臨安府洞霄宮授少

保寧武軍節度使荆湖廣南宣撫使判潭州軍

州荆湖南路安撫大使加食邑食實封制

門下位左棘以建旄兼總宣威之任殿南邦而分閫益  
隆統牧之權疇咨祕殿之英越在羣公之表倚重臣而  
彊本釋真館以圖庸參錫徽章載賜顯冊某官某忱恂  
而寬裕剛毅而沈潛緯武經文可大則賢人之業集思  
廣益至公以天下為心亮采日嚴訏謨辰告久贊襄於  
衮職遄燕佚於琳庭冠元豐寓祿之階羽儀賜位峻皇  
祐崇儒之秩領褒延恩養恬雖適於雅懷應變未殫於

遠畧睽武安之鉅鎮屹方面之要衝地控重湖內欲腹  
心之先備疆連五嶺外如唇齒之相依銷患未形維人  
無競迪思高廟有若臣綱繇舊弼而命旬宣即中權而  
領藩翰徒得君重載纘武功是用篆車升亞保之班茸  
燾授益昌之節兵事不由中御合楚粵以撫師戎乘以  
先啟行指衡湘而植屏數路聽和門之令十連尊元帥  
之稱申衍圭畬陪輸幹食以新采薇治外之畫以謹徹  
桑未雨之防於戲陶侃啟長沙之封嘗督軍於交廣方



叔振中鄉之旅佇執訊於蠻荆精神折衝則國勢張指授當任則人心靖欽承猷訓懋建膚公可授云云

寧江軍承宣使左驍衛上將軍金州駐劄御前諸軍都統制授武康軍節度使右金吾衛上將軍興元府駐劄御前諸軍都統制加食邑食實封制

門下錫齋旄而啟鎮載聯中尉之華總禁旅以修戎益重西陲之寄乃睠蕃宣之儁夙殫守衛之厯疏陟典以

褒勲更要衝而統戍明颺渙號敷告師虞具官某果毅  
而樸忠沈雄而肅活營平守節深料敵之威謀票騎抗  
旌懷冠軍之姦勇列武威而拱極臨清水以乘邊王旅  
嘽嘽克壯金湯之勢戎容暨暨聿張箕翼之形迪簡予  
衷茂嘉乃績念漢中之保障控益部之衿喉復險要於  
舊圖于疆于理峙屯營於東道維屏維藩師徒甫集而  
未蘇裨壘方更而未固將飭不虞之備亡踰已試之良  
是用新駱谷之建牙易夔江之留務鶻冠魚服陞峻秩

於執金犀甲熊旂侈多儀於授鉞如乾道顯忠之並命  
若紹興楊政之進屯以嚴細柳堅壁之威以恢采薇治  
外之畧申加井賦增資坤維於戲登拜將之壇決策蓋  
繇於南鄭上出師之表駐軍欲定於中原惟山川未改於  
昔時則事業盍參於前哲典聽朕毖式固爾猷可

趙葵特授少傅依前觀文殿大學士充醴泉觀  
使冀國公加食邑食實封仍令所司擇日備禮

冊命制

咸淳元年  
二月三日

門下朕祇遵燕謀丕承鴻業佑民作君而相上帝惟懷  
永圖貳公弘化而弼一人式序在位瞻言碩望首錫茂  
恩晉左棘之穹班渙大廷之顯冊少保具官趙葵寬閒  
而肅括俊偉而光明文武憲于萬邦有應變折衝之畧  
忱恂迪于九德有庇民尊主之心出則秉斧鉞以董師  
入則踐樞衡而穆綽謙謙終吉蹇蹇匪躬願從赤松進  
退合於禮義非謂喬木老成重於典刑肆予紹休若古  
訪落追先帝之遇諒懷欲報之忠貽哲命之初靡忘用

德之訓誼敷需澤可後者英昔寧皇之登至尊命必大  
而升亞傳有嘉雅操允蹈前聞夏篆通疆峻躋特揖祥  
源使組仍冠延恩增多邑於采封衍真奮於圭食以篤  
股肱之舊以昭體貌之隆於戲世服勞紀於太常夙懋  
屏毗之績身雖外心在王室尚遵寅亮之謨永肩遠猷  
益介純嘏可

淳祐三年蔡除右丞相到京言者謂宰相須用讀書人蔡知之徑出國門上表辭曰

霍光不學無術每思張詠之語以自慙  
臯陶所讀何書敢以趙抃之言而自解

程元鳳特授少保依前觀文殿大學士充醴泉

觀使新安郡開國公加食邑食實封仍令所司  
擇日備禮冊命制

門下仰惟前代訓官莫重貳公之任永言孝思嗣服聿  
懷有佐之賢朕寅紹丕圖恪遵成憲仁霑恩洽用大賚  
于善人謨明弼諧寔勸相于烈考晉班孤棘孚號明庭  
特進某官程元鳳德厚而器閎學醇而識遠浩然養以  
直盡責難陳善之恭休焉如有容得持美効君之體輔  
贊而藏諸用動靜不失其時藹聞藩翰之庸自適丘園

之佚訪予落止數時繹思惟舊人知若勤所以報先帝  
有嘉猷則入告罔不祗師言緊我碩儒可無異數昔孝  
皇之盛際重亞保之殊榮臣浩以耆彥而叙升俊卿以  
宿望而延拜茲率厥典載錫之光希冕篆車峻外朝之  
特揖珍臺間館仍秘殿之隆名申陪采邑之封益行圭  
畬之實匪惟霑渥式示褒章於戲罔以寵居成功久遂  
伊尹告歸之志在厥初貽哲命無忘召公為保之規克  
邁前修永綏多祉可

謝方叔特授特進依前觀文殿大學士惠國公  
致仕加食邑食實封制

門下嗣德固不在初惟忠厚為家法舊人不克遠省惟  
爵齒為達尊顧予纘圖爰命施惠敬休億萬載燕及皇  
天咨爾二三臣既右烈考乃睠垂車之佚誕頒錫位之  
榮繹于師虞敷以渙號金紫光祿大夫具官謝方叔闕  
深而肅又枕裕而粹夷經德不回凜松柏後凋之操秉  
心無競抱珪璋特達之姿曩宅揆以奮庸善守文而持



正仲山之明且哲以保其身孟軻之致為臣皆有所式  
行願素履之吉受祉黃髮之宜澹空谷之自持藐浮雲  
之何慕惟今立政稽古尚賢未遑設几以須若仁祖遇  
行之禮必有進官之寵若哲廟待絳之儀聯華一品之  
階冠序羣公之表適觀故事實非上宰以不除用獎耆  
儒庶仰清風而咸聳仍延恩之邃職增奉邑之新畬於  
戲踐阼而問丹書朕既迪周王之訓箴國而作懿戒爾  
益逾衛武之年俾壽而藏有猷則告可

方叔以琴一張  
丹藥一爐獻上

蓋以舊學故也似道疑其有觀望再相意令全臺劾之以為不當誘人主為聲色之好欲謫遠郡賴呂文德以已官贖丞相之

罪遂得免論

嗣榮王某賜詔書不名依前皇叔太師武康寧

江軍節度使判大宗正事嗣榮王加食邑一千

戶實封四百戶制

門下朕式叙周宗若稽漢典姬公叔父我國家禮亦宜東平詔書兼親尊敬之至睠師垣之領使眡憲靖以疏恩紫微令之華屢陳冲避前寧人有訓別議優崇敷告

治朝申加異數皇叔具官某融明而迪德寬厚而履和  
文章規諫自防粹然君子之美仁義忠信樂善不以人  
爵為高一命袞而紹封大宗翰而植屏勲在王室如虢  
叔天錫純嘏如魯邦惟孝友于兄久行葦之內睦因心  
篤其慶愴棠棣之孔懷哀敬有餘禮儀既備對越清廟  
在天之烈適遵阜陵後土之儀長於西臺式是百辟專  
席之拜巖巖維民具瞻閱理之深謙謙以卑自牧勉從  
頻巽曷稱顯庸昔天聖初褒定王之碩望越元祐際展

徐邨之茂親凡賜絲綸植隆體貌有德爵齒之重錫山  
土田之多祇率徽章丕昭殊渥於戲孔子稱達孝之繼  
志敬其所尊伊尹言諸父之不名是謂大順增光簡冊

燕社盤維可

按嗣榮王賜詔不名制用說施事說施曰君之所不名者四諸父臣而不名諸兄臣

而不名先王之臣臣而不名盛德之士臣而不名是也  
又慶元中嗣秀王賜贊拜不名鄭溥之草制云天下之  
達尊三德兼爵齒以俱茂人臣之不名五老與親賢而  
比隆公羊傳註禮君子臣不名者五諸父兄不名上大  
夫不名盛德之士不名老臣不名  
二說相須詞臣兼用之可謂博矣

嗣榮王進封福王主榮王祀事加食邑一千戶

食實封四百戶仍令所司擇日備禮冊命制

門下朕紹天駿命若昔鴻猷建令德以屏周昭備物之  
典策封近親而輔漢開大國之土疆惟時叔父之尊峻  
極帝師之貴名位宜加于異數山川猶襲於舊邦長樂  
慈謙謂褒崇之未稱先王篤愛豈沖眇之敢忘進爵分  
圭涓辰渙綍皇叔太師與芮秉心寬裕迪性高明赤鳥  
之德碩膚樂善不倦綠竹之文瑟僖大盈若沖閱理義  
以既多服儉恭而惟一羽翼聖考表儀天支鞞鞞棣華

之和振振麟趾之厚肆予承序立敬在初康叔之屬獨  
尊助茲宅命東平之恩莫比詔以勿名載錫寵光未隆  
體貌何以適追於先志蓋嘗參繹於前規仁祖優定邸  
之賢更封於鎮哲廟殊曹國之睠賜履於荆皆由下武  
之孝思推為行葦之內睦率循彝憲可後徽章是用瑒  
金璽而胙真田錫赤社以介景福三山寰宇徽號肇新  
雙節齋壇多儀維舊寅念寢園之奉具嚴烝祫之修盛  
德百世祀虞丕衍統承之慶眉壽千歲保魯茂迎昌熾

之休仍董正于宗盟併豐倍於采邑於戲九經尊位以  
重祿必先諸父之親萬年惟王永保民尚式庶邦之典  
與宋無極純嘏是常可

榮王度宗生父理宗弟德祐元年議建藩屏以強王室授紹興

府湖東安撫大使置長史司馬  
後從幼主入覲封平原郡公

呂文德依前少保寧武保康軍節度使京湖安

撫制置大使屯田大使兼西川策應大使兼荆

鄂州軍州事兼管內勸農營田使兼侍衛馬軍

都指揮使霍丘郡開國公加食邑七百戶食實

封三百戶制

門下朕祇承景命懋敬肇禋定郊祀而允集壇稽正月  
於漢典見宗祖而躬執禮參元日於唐儀乾度昭清坤  
儀肅穆聞金支羽林之樂時則興鞀鼓之思觀玉路辰  
旂之容時則念旂常之績既輯欽柴之貺趣申位棘  
之褒揚於昕庭敷我餼澤具官某器資閎毅志槩忠純  
來旬來宣而告成協濟陳師之畧有嚴有翼而共武屢  
書敵愾之勲乃兼雙節之榮乃踐貳公之列討軍實而



申儆克壯其猷未陰雨而綢繆以固吾圉朕惟除戎斯  
致孝享治外可告神明幸甘泉阻夕烽之虞建參旗馳  
月捷之奏蓋以本強於荆土用能表拓於蜀疆于救圖  
功其綏多福茲庸加勞而賜胙亦如相祀之執膳爰賦  
增封真畬行食於戲覲羣牧而班瑞朕率循肆類之初  
敏戎公而錫田爾尚迪對揚之祉益恢茂烈永乂嘉師

可文德帥蜀嘗復瀘州及在襄陽  
壞於玉帶利之害人如是哉

### 楊淑妃制

門下朕祗率邦彛適修內治周南之得淑女正王化而  
厚人倫唐典之建列妃贊后職而論婦禮寅奉慈宸之  
訓爰登世閔之華颺於昕朝示我德選美人揚氏凝姿  
敏惠迪性柔嘉圖史有聞鍾襲紫傳龜之慶言容可度  
蹈佩環鳴玉之飾展如法相之良溫其內則之媿惟朕  
飭已以敬齊家在初睠葛覃樛木之詩本原既正凡莖  
若蘭林之列位號靡充妙簡壺儀晉聯宮秩恪助思齊  
之至養式孚長樂之徽言謂象著四星盍仰模於乾緯

而教行九御疇協輔於坤闈載錫茂恩用光懿範名超  
賢德榮參掄翟之衣品眡公台采絢金章之綬惟時異  
數若昔令猷於戲王假有家天被爾祿朕怡愉而后佐  
餽爾其承視膳之恭朕節約而后親蚕爾其戒曳衣之  
侈朝夕有無私之志夙夜有相成之心益行祉於紫庭

永流芳於彤管可特進封淑妃

淑妃楊氏也益王昱既  
登極妃稱皇太后聽政

時庶事疎畧楊氏與羣臣語猶自稱奴崖山既敗楊氏  
聞帝崩大慟曰我忍死艱闕至此者正為趙家一塊肉  
耳今無望矣遂赴海  
死張世傑葬之海濱

王燾依前少保特授平章軍國重事一月兩赴  
經筵五日一朝仍赴都堂議事加食邑食實封  
制

門下尊賢敬大臣莫重乎老成典刑之望治國平天下  
莫先乎內外修攘之規矐予宅揆之英允有經邦之畧二  
人同心之助方共濟於多艱一日萬幾之繁不欲勞以  
細務優加異數孚告明庭具官某清任而和剛大以直  
守文持正至公以天下為心尊主庇民可久則賢人之

德行藏繫善類之消長出處關時運之盛衰惟上帝賚  
予爰立作相惟舊人遠省惠然肯來定大計如砥柱之  
不移折姦萌若元龜之先見改紀其政適求厥寧道德  
成乎安疆國勢復振將相和則豫附人心寔回以救圖  
功不應徯志蹇蹇匪躬之故允惟房杜之濟謀休休其  
心有容乃效臯夔之相遜朕若稽元祐圖任宿儒一老  
時游廟堂咨以大政二相並秉鈞軸協於同寅祇率彝  
章參建碩輔特崇耆艾之禮俾居勞佚之間舉其宏綱

維天保采薇之治詢茲黃髮有訪落小毖之謀入開導  
於經帷間從容於朝宁圭畚申錫體貌益隆於戲方叔  
克壯其猷朕庶幾復古之績伊尹自任以重卿勿替格  
天之忠壽俊在服則外患消訏謨定命則治本立懋乃

一德登于丕平

燾既為平章以為二相宜一人督師臣雖無能為若效死封疆亦不敢辭宜中

事多專決不關白于燾及張世傑敗焦山燾謂國勢尚堪幾敗乞罷平章宜中徑去乃罷燾平章軍國重事以少保觀文殿學士充醴泉觀使是歲辛燾清修剛正不阿累疏乞正賈罪國勢危亡不能協謀以濟大事士論之惜

陳宜中特授右丞相依前兼樞密使都督諸路  
軍馬加食邑食實封制

門下朕思濟多艱疇咨碩望惟尹躬有一德右厥辟而  
宅師惟說命總百官置諸左而納誨嘉乃經綸之學弼  
予救寧之功無競維人倚同心之輔政式序在位協鼎  
足之承君延拜元台誕敷特制某官某德秉乎洪毅識  
造乎高明知仁勇之資治國家而有裕剛大直之氣塞  
天地以無疑簡在先皇俾輔後嗣贊雷厲風飛之決宗

廟再安開否消泰長之機紀綱一正定衆志於綴旂之  
際回治象於驚濤之衝精神強而英雋聚朝指揮當而  
將士用命忠貫皦日未嘗言房杜之功計安生民將欲  
復文武之境迺若休休有容之度藹然濟濟相率之風  
蓋開忱布公之心猶恐無助而應變守文之美其維協  
恭若昔元祐之隆登庸成德之彥閔勞大事咨重臣之  
謀儀圖真儒冠上相之任祇適先憲增光前聞六月薄  
伐而飭戎車仍領督軍之寄千里決勝而運籌幄聿嚴



基命之謨以尊冢宰掌邦治之權以懋百揆熙帝載之  
績申倍邑采丕聳巖瞻於戲四方既平時靡有爭朕正  
倚修攘之畧三后協心同底於道卿益恢康濟之猷惟  
時惟幾以迓天休惟和惟一以凝國是保大定功而干  
戈戢更化善治而福祿來義我受民欽若成烈可

似道  
出督

以宜中受卯翼之恩且柔順易制委  
以國賈敗宜中首劾賈罪以自解

留夢炎特授宣奉大夫右丞相兼樞密使都督  
諸路軍馬加食邑食實封制

門下選衆而舉臯陶有虞所以凝庶績相右而命召奭  
成周所以保受民迪思先皇敷遺哲輔運籌決勝惟簡  
在上帝心宅揆奮庸其毖我成功所告爾多士揚於大  
廷具官某學醇而識閎德厚而才裕尊王秉禮之大義  
深於春秋揅時行道之精忠貫乎日月以少雙寡二之  
望為特立獨行之儒精神折衝兼文武之畧夙夜基宥  
冠樞機之謀既具瞻之素孚謂延登其已晚棟隆不撓  
碩果猶在南國是式作爾庸懋乃攸績王事靡盬不遑

處扞我於艱欲經營四方以平戎用獎率三軍而興漢  
維萬民徯司馬之入而上宰遜王曾之來豈煩勸誦於  
經帷咸望協熙於帝載矧今天變未弭國步未寧明黜  
陟所以制治保邦修政事所以整師復境爰立作相於  
救圖功元祐並命三賢若純仁之躋次輔紹興摠提二  
枋若臣浚之督成師陟序崇階衍賦多邑庶幾真儒無  
敵之效丕展良弼輔德之謨於戲待裴度而開延英時  
惟舊人圖任濟房喬而斷大事尚冀乃僚同心三后協

可以澤生民衆正開可以杜羣枉指授當任則邊氛靜  
處置得宜則國勢強式固爾猷克邁乃訓可

夢炎自狀元至宰相

在位不克振修攘之烈給舍言其外令復諫今之敗降者皆其任用之士遂棄去宋亡入見京師規求進用謝昌之荐之降吏部尚書至翰林承旨世祖嘗曰夢炎位至宰相賈似道諂諛誤國不能救葉李布衣乃能伏闕乞斬似道命趙孟頫為詩以譏之孟頫曰狀元曾受宋家恩國困臣強不盡言往事已非那可說且將忠赤報皇元

葉夢鼎特授充醴泉觀使兼侍讀依前少傅觀

文殿大學士信國公食邑食實封如故制

門下朕更張初政率籲宿儒詢黃髮則罔愆閔勞宅牧

之事學古訓乃有獲延登勸誦之聯惟尊德樂道以有  
為庶遺大投艱其求濟勉從巽牘誕布渙綸具官某剛  
大而粹明忱恂而閑裕海濱大老懍廉頑立懦之風天  
下達尊懋輔世長民之德碩果表於羣彥靈光歸乎三  
朝責難謂恭陳堯舜之正道不可則止恥由求之具臣  
肆予改弦申命賜履望公如望歲允有甘棠之思治民  
如治家丕僕黍苗之澤以楚丘之謀始壯而東山之志  
不渝股肱力汝為不欲煩於方面耆壽俊在服其進彊

於本朝念沖人道問學之初維大臣傳德義之益紹興  
舊弼冠延恩之職而敷經淳熙耆英領祥源之使而詔  
讀若稽茂典載錫優章肯從我游克邁乃訓於戲問丹  
書之敬義母勤師尚父表海之行瞻綠竹之琢磨尚迪  
衛武公箴國之戒有謀則就盍歸乎來可

賈似道專政  
夢鼎不得行

其志利州轉運使王介子懇求遺澤夢鼎以為合與似  
道以恩不出已罷吏數人夢鼎曰我斷不為陳自強即  
求去似道母責似道曰葉丞相安於家食汝強與之相印  
今乃牽制若此不從吾言吾不食矣似道曰為官不  
得不如此乃使人謝夢鼎  
夢鼎乃已後奉祠家居

夏貴特授兩淮宣撫大使知揚州依前開府儀  
同三司寧武軍節度使左金吾衛上將軍樞密  
副使兼侍衛馬軍都指揮使食邑食實封如故

制

門下聽鼓鞀思帥臣倚一賢而強本戒師旅率淮浦兼  
兩路以宣威朕逢時隱憂注意宿望授西討之畧方屢  
奏於膚公先元戎之行趣往臨於鉅屏王言作命士聽  
無譁具官某良實而忠純沈潛而果毅屬大事可當一

面雖草木莫不知名方畧無踰老臣樽俎足以却敵有  
厭難折衝之壯志有憂國愛民之盛心慨王事之棘則  
夜夜而行憤狄難之熾則纓冠而往風聲鶴唳策淝水  
之奇勲士飽馬騰占郾城之勝氣貳樞列於西輔儀台  
眎乎三公維元老之方叔以飭師千維黃髮之尚父以  
秉旄鉞戎容暨暨趣咨籌幄之謀淮水湯湯尤重廣陵  
之鎮念閫寄分任則氣勢弱必事權合一則臂指從欲  
表裏撐拓之得宜庶首尾運掉之相應昔高廟之復古



命世忠而捍城茲宏建於使名俾菑攘於外侮陝東西  
盡護於諸將江南北嚴守於要衝蔽遮甸畿控禦都會  
式固吾圉亟為朕行於戲來旬來宣告成於王既任召  
虎平夷之寄有嚴有翼共武之服益懋吉甫憲邦之功  
威信孚可以輯人和號令明可以作士氣適圖耆定汜

濟多艱可

此在陽羅堡喪師之後貴既失長江惟恐督  
府有戒罪無所逃又恐孫虎臣以後進為將

有功總統出已上日夜幸其敗督府既清貴歸廬州屢  
詔不出若罔聞知國士乃以淮西全境歸附以為己功  
世祖俾為平章後四年卒將葬僧祝之曰今年  
八十四何不七十九白骨葬青山萬古名不朽

孫虎臣特授清遠軍節度使加食邑食實封制

門下朕注意戎昭疚懷邊難賜諸侯弓鉞用進律於有  
功建大將鼓旗爰設壇而具禮告爾多士揚於明廷具  
官某志槩忠純器資雄毅有禦侮折衝之畧援桴鼓則  
忘身有牧人御衆之才執干戈而衛社式固吾圉屢奏  
膚公擊節誓中原之清矯矯冠軍之勇鳴劔馳伊吾之  
志洸洸敵愾之勲憤烽燧之頻驚率熊羆而攘却表撐  
裏拓嚴保障於海陵左弭右韃懍威稜于江許庶幾報

彭衙之役豈止復鴈門之踦淮浦修我戎倚招携而討叛  
師中承天寵當懋賞以陟明膺將軍跪轂之榮錫融水齋  
旄之命增封多衍食邑真畬以旌細柳堅壁之勤以恢采  
薇治外之績於戲邊境功名在良將朕惟獎勵於忠貞兵  
事節度皆付公爾亟肅清於氛祲祇若茲訓扞我於艱可

張世傑特授保康軍節度使左金吾衛上將軍  
淞西制置副使兼知平江府仍舊帶行樞密都  
承旨揚州駐劄御前諸軍都統行樞督府總統

一應軍馬加食邑食實封制

門下千里之內曰畿莫重乎根本之地十里為連有帥  
莫兼嚴乎弓鉞之權惟予沖人未堪多難出車王事棘  
矣孰或過於要衝跪轂將軍制之爰疇咨於宿望建淑  
旂而分閫敷明綽以揚庭某官某雄毅而沈潛忠良而  
篤實帷幄決子房之勝方畧運於弢鈴草木知萬福之  
名威稜憺於邊境矯矯冠軍之勇惓惓衛上之忱修戈  
矛與同仇志殄滅夫強敵敵師徒討亂畧躬獎率於顏行

愾綴旂之陟危首投袂而入援執訊獲醜采薇之捷屢  
書披霧清氛前茅之氣大振再念吳門之危急嘗勞師  
律之蓄攘却敵賢於長城徼卿民其左袵今堂奧之寇  
寔迫而藩籬之重當嚴稽中興名將之成規膺右制  
垣之重寄謹固保障則常潤可復汎掃妖祲則京師以  
寧克壯其猷用錫爾祉齋壇授鉞領巨鎮於房陵吾臣  
司金盛戎容於緹騎以危難之間受任以節度之事付  
公兼昇牧守之榮益彊屏翰之勢衍其采邑明我茂恩

於戲地利不如人和朕遙求於多助武服以定王國爾  
趨奏于虜公三軍同力以收復宇之勲衆心成城以集  
安民之績俾金湯之不聳永帶礪之有光可

世傑信安  
歸正人時

京師內空賴世傑提兵自荆湖入衛二王航海世傑扈  
駕由定海趨三山益王登極拜少保圍泉州索多救兵  
至遂解圍去衛王即位拜太傅戰于崖山敗績奉揚太  
后以小舟奔取辦香仰天呼曰我今為趙氏亦已至矣  
一君亡復立一君今又亡我奉皇太后走者庶幾復求  
趙氏後立之以存趙氏若天不欲之則大風覆吾舟遂  
死溺

高達特授少保依前寧江軍節度使左金吾衛

上將軍荆湖北路制置副使兼安撫使馬步軍  
都總管兼知江陵軍府事管內勸農營田使節  
制本府屯戍軍馬固始郡開國公加食邑食實  
封制

門下朕倚重上游圖寧多難命率以衛中國佇聞執訊  
之勲式公而弼一人允迪保邦之訓酬勞進律孚號揚  
庭某雄深而尚謀福艾而持重廉頗為將豈憂匈奴哉  
充國撫兵無踰老臣矣名著硯山之草木計安鄂渚之

金湯慨彼相之忌功不能蚤服迨我圍之孔棘未嘗辭  
難命以江滸告成於王鎮於荊州用武之國憤螽賊搖  
我疆之慘投鞭斷流恃熊羆不二心之忠若防制水元  
戎十乘以禦侮於危急二矛重弓以協力於旬宣維樞  
臣趣勤王之行而閩寄專守圉之任東連吳西連蜀爾  
為長城卯受詔辰出師爾紹前烈徯采薇三捷之奏濟  
位棘亞保之班在昔世忠暨於張俊皆自儀同而序陟  
用勸殊庸今以校聯而真除時維茂渥蓋注意隆則恩



必厚錫寵優則功可期衍食真畜增光齊鉞於戲嘽嘽  
戎車方叔率止朕有嘉克壯之猷烈烈征師召伯成之  
爾尚集既平之績祇承異數懋建膚公可

達荆湖名將  
鄂州之圍高

達帥諸將力戰似道自漢陽至鄂督師達恃其武勇殊  
易似道每見其督戰即戲之曰魏中者何能為哉將戰  
必須似道親勞士始出否則使軍士譁於門似道由是  
銜之許其建節而不予達怨望久矣及達制置江陵遂  
以城降於元命來襪孫檄京湖北路於是歸郢鄂復鼎  
澧辰沅靖常德荆門相繼降襪孫至上都死今觀高達  
擬制稱依前武康軍節度豈已嘗建節故耶或將建節  
以降故不克用耶中言慨彼相之忌功不能早用則賈  
相忌功之罪  
不可掩矣

祭文 內制

九虞祭

第一虞 至六虞 太常卿行禮

相攸禹會穆卜漢陵弓劍既藏美牆如見祭初易奠永  
極哀號

第二虞

靡瞻匪父莫親栢隧之臨速反而虞無復菽輶之見妥  
于仍几申以貳觴

第三虞

仙馭邈然如望弗至神旆歸止不顯亦臨罔極一哀有  
嚴三祭

第四虞

虞儿安行愴駒陰之信宿容衣如在香龍駕之空濛荐  
禮四陳哀棕九折

第五虞

濤江東邁永懷復土之哀  
翊衛西歸五展寧神之祭  
未

縣躬荐深切心摧

第六虞

穆陵告備想先烈之如存清廟揭虔佇靈旂之來祔將親几奠永切弓號

第七虞

皇帝親行禮

因山既備心如慕以如疑作主是依神來寧而來宴始親荐奠罔極哀摧

第八虞

皇帝親行禮

率時昭考尚思憑几之言瞻彼昊天如見虞觴之奉荐  
儀將畢哀素無窮

第九虞

皇帝親行禮

千秋永穆之陵廡儀已闋萬世理宗之廟祔禮將行奄  
進終虞曷勝追慕

遣守臣奏告南嶽

巖巖喬嶽奠於南邦仁氣所鍾佑民儲祉敵為不道逆  
天犯順江漢之域荼毒橫流爰及長沙氛祲益熾兵民

堅守保障不搖助順惟天降福惟神潔齊精祈庶克者  
定威靈有赫電掃凶醜師直為壯亟奏膚公萬里長江  
咸復舊守湘水清謐用乂我民於萬斯年永錫純嘏

奏告滁州端命殿太祖皇帝神御

皇祖造邦以仁興武清流丕績駿命造基揚虔安靈輝  
赫萬世敵為蛇豕荐食无厭維此滁城式固封守威神  
在上實任綏之敵梗饜道疆圉孔棘分命籲告徼福祖  
烈為民請命殄殲凶醜汎掃賊壘耆定武功江漢謐清

永又區夏

青詞

內制

仲秋潮汎吳山忠清廟設醮青詞

神甸襟江萃民居之浩穰潮靈從月應秋皇以奔騰維  
金堤捷石之方增慮銀屋駕壽之莫禦匪依洪覆曷即  
敕功祓飾真科吉圭芳荐願賜穆清之鑒申敕濛鴻之  
祗海不波揚誕登年而汜濟天無風烈究安宅以咸寧

祭文

內制

祭濟王文

皇帝遣具官王應麟致祭於皇伯祖故少保保靜鎮潼  
軍節度使濟王贈太師尚書令追封鎮昭肅王之墓唯  
我理祖因心則友則友惟兄惟王令德孝恭為宋泰伯  
叔臣顓政追感王於淮南之寃九原鬱憤踰五十載理  
宗篤叙天倫哀念不忘端平更化亟命復爵維繼絕崇  
贈之典以待後人度考踐阼首啟追復之詔肆惟沖人  
繼志存恪今北敵犯順國步孔棘氛祲迫於雲川夙夜



兢兢思所以回上天悔禍之意用仰成祖宗厚睦之心  
贈王師坦端揆進封大國錫以令謚命大宗正選宗屬  
為王後賜田萬畝俾奉烝嘗仍戒有司修崇王墓英魂  
如在歆我卹章默相陰佑亟殄強寇扶持宗社保乂生

民祖宗在天實寵嘉之王之春秋享祀亦永永無斁

王葬

湖州山水惡絕蓋當時權臣為之昔朱全忠降昭宣帝  
為濟陰王濟卹之封取濟水獨絕之義又蕭衍篡齊降  
和帝為巴陵王而齊王亦降封巴陵公用心如此亦可  
謂無忌憚矣夫巴陵之變踰五十年羣臣以濟卹為言  
者皆斥去及大兵壓境繼絕崇祀之典始克為之踰年  
社稷為墟矣春秋祭祀之不享豈獨王哉袁文清公曰

吳夫人復封端平之初也復立濟祀  
德佑之末也馴至于此其可言哉

樂章

曾參孔伋配食大成樂章

酌獻曾參邲國公

心傳忠恕一以貫之爰述大學萬世訓彞惠我光明尊  
聞行知繼聖迪後是饗是宜

酌獻孔伋沂國公

公傳自曾孟傳自公有的緒承允得真宗提綱開縕乃

作中庸侑於元聖億載是崇

宋咸淳三年度宗幸太學  
詔升曾參邾國公孔伋沂

國公配享先聖孔子廟廷時厚齊公權直學士院樂章  
實其撰著宋亡元世祖詔定先聖先師釋奠儀其邾沂  
二國遵而用之遍及天下迨將百年而莫有知出於公  
之手者固宜表而出之世祚既移郡邑庠序俎豆之事  
為之暫輟後有舉而行者不知復能用公之文被之  
弦歌以昭格享之實否乎觀於此者感繫係之矣

咸淳元年正月臣應麟以著作佐郎暫攝閏五月兼

翰林權直二年正月為軍器少監陞學士院權直三

年三月以將作監陞權直學士院德祐元年三月除

中書舍人兼直學士院四月入院前後再入北門凡

四年咸淳元二間及德祐之元多獨直云臣應麟謹識

制誥之來尚矣自晉開運元年詔翰林學士與中書舍人分為兩制有唐號為全備至宋而猶盛文章之士極天下之選然後用之任不亦重乎故事翰林書詔付門下者為內制而以中書行詞者為外制凡大冊命鎖院則命內侍於學士私第傳旨執仗者異常服呼嗒以俟勞以酒饌然後上馬傳呼夾道行者辟

易既至宦者遂以入制成翼日黎明捧金盤進御以  
金刷印可既宣讀乃謝恩受賜而歸吁其不榮矣乎  
哉故翰林學士厚齊王公嘗三入北門咸淳德祐初  
多獨直且兼掌西掖詞命一時宣鎖多屬之至於獎  
予批答之辭祠疏冊祝之禮紛紜雜還晝夜不停蓋  
自有宋以來其敏捷如公者可數矣今即其詞而觀  
之激厲奮發足以感泣三軍勤拳諄復足以警惕百  
揆誠敬惻怛於以感格神明淵深博洽於以包絡今古

方且一詞之出土大夫傳寫殆遍綸言以蘇軾比之孰謂宋祚將亡而有斯人也耶書曰俾萬姓咸大王言其公之謂乎後學滎陽生鄭真再拜謹識

四明文獻集卷四

謹案第二十二頁後四行索多舊作唆都今改







總校官候補中書臣吳紹潔

校對官待詔臣胡士震

謄錄監生臣金拔

欽定四庫全書薈要

集部

四明文獻集卷五



詳校官助教臣謝登雋

欽定四庫全書薈要卷一萬五千九百九十六

集部

四明文獻集卷五

宋 王應麟 撰

詔

翰林學士知制誥兼侍讀除同知樞密院事詔

詞科所業

後篇同

勅股肱一體相成祇適時幾之戒文武萬邦惟憲儀圖  
翰墨之英朕迪前人光盛成功所在咸平有若臣旦在

嘉祐有若臣修擢繇禁林登貳樞極帷幄收頗牧之績  
樽俎折輦允之謀無競維人式序在位翰林學士知制  
誥兼侍讀某養剛大之氣好深湛之思學道乎中庸總  
五經之眇論文澤乎仁義信三代之餘風灼見俊心贊  
為名命代言溫雅發號施令罔不臧勸誦從容陳善閉  
邪謂之敬屢訪河西之邊事咸聳山東之詔書嘉其知  
軍戎之情進而與甲兵之問爾猷則告我武維揚噫夙  
夜基宥單厥心勿替協恭之助國家閑暇明其政具嚴

思患之防以又受民俾紹先烈可授同知樞密院事

起居舍人兼侍講除中書舍人兼禮部侍郎誥

勅周史之掌贊書列於禮典舜官之出帝命先以秩宗  
朕登崇譽髦藻飾治具迪簡敷經之彥久儀簪筆之聯  
錫我茂恩對時妙選起居舍人兼侍講某簡廉載采博  
審好修砥行立名濟濟扶陽之禮弼中彪外衷衷樂安  
之文仁義其言藹如直諒多聞益矣欽起居而在右君  
舉必書考仁聖以陳前古訓有獲丕從朕志曰求厥章

昔元祐擢軾於螭塗晉司帝制紹興寘遵於鳳閣復貳  
春卿惟文學咸精能俾播告不匿指咨爾兼組賁於演  
綸為誥有古風罔俾仲舒之媿同日加兩命允謂知章  
之榮予欲善辭令以華國汝為予欲觀會通以秩典汝  
翼庶幾終譽式克欽承可授中書舍人兼禮部侍郎

按詞

學指南云誥告也其原起於湯誥周官太祝六辭三曰  
誥士師五戒二曰誥成王封康叔唐叔命以康誥唐誥  
漢元狩六年立三子為王初作誥唐白居易集翰林曰  
制詔中書曰制誥蓋內外命書之別宋西掖初除試誥  
而命題  
亦曰制

章鑑特授端明殿學士同簽書樞密院事誥外制

掖垣薰以下

同咸淳八年

勅祇勤外治劫毖中樞以救寧武功倚羣賢之彊本惟  
幾康弼直咨同德之合謀迪簡蓋臣誕揚明命具官某  
器裕而守正識融而履純中和不倚不流得諸涵養之  
厚學問如磨如琢從我新益之游俊心灼知賢業可大  
乃踐爭臣之列乃儀常伯之聯繩愆格其非出納惟允  
陳善謂之敬就將有光察其忠嘉宜在宥密念采薇守

衛之策正徹桑綢繆之時風寒嚴護於江淮月捷冀清  
於襄岷有常立武無競維人若頤浩繇天官而升若晏  
殊以宮室之舊俾陪借箸之畫式協推車之忱班書殿  
而總要經爵躬圭而增多邑其贊帷幄籌之運以成道  
德威之強噫在元祐則巖叟謹言用君子而保國在中  
興則臣鼎遠慮申軍律而治兵共濟明謨克邁前哲可  
鑑仕至宰相聞元兵日迫托故徑去太皇太后遣  
使召還罷相予祠鑑居位多許可時目為滿朝歡

李庭芝特授參知政事依舊淮東安撫制置大



使兼知揚州兼淮西策應大使誥

德祐元年

勅祗適先猷儀圖哲輔慶厯彥博之參國秉肅將河北  
之征師紹興臣鼎之預政除擢繇江右之大閩乃睠榦  
方之績延登醲假之聯載錫褒綸率循茂典具官某洪  
深而肅哲碩大而光明曰閩外制之蘊知國知兵之略  
言長城遠矣兼允文允武之才屬邊瑣之孔艱嚴風寒  
之謹護淮浦戒我師旅率勵勤王之忠執政獨吾股肱灼  
知體國之志朕愼采薇治外之急思集蓼莩患之謀勅

命惟時惟幾盍惜陰而攘却繼今立政立事其揆策以  
贊襄是用擢貳台衡仍分閫鉞以協濟日萬幾之務以  
耆定月三捷之勲旂壘如光弼之增明廊廟有德裕而  
益重衍其采邑壯乃威聲噫東方畢公率之雖身外而  
心王室北伐張仲在矣共武服以奏膚公無競維人往  
敬用治可

李庭芝特授知樞密院事兼參知政事誥

勅思濟多艱疇咨碩輔文附衆武威敵懋時屏翰之勲

內修政外攘夷簡在股肱之寄圖任亦惟求舊折衝何  
必臨邊爰登一賢俾贊二枋具官某才鉅而識遠德粹  
而量閎儒士知戎情挺挺崇詩書之望身外心王室惓  
惓安社稷之忠金城淮浦之要衝砥柱廣陵之巨鎮執  
訊獲醜屢奏膚公協恭和衷肆命予翼慨念勤勞於強  
圉莫如謀畫於廟堂第一星曰天樞晉陟籌帷之冠間  
兩社為公輔復參台路之謨若王蘭之在淳熙若昭先  
之於嘉定迪惟注意允矣兼資趣介圭之來朝衍采邑

而孔厚噫率有指疆土朕思救武以圖功其克詰戎兵爾尚又民而立政懋展真儒無敵之畧適恢中興復古

之規可

時伊實圍揚久庭芝守禦益力臨安既破阿木以太后手詔諭降不從及帝次瓜洲太后復賜

詔曰比詔卿納款日久未報豈未悉吾意尚欲固圉耶今吾與嗣君既已臣服卿尚為誰守之庭芝不荅謂其客曰吾惟一死而已伊實復遣使持太后詔招之庭芝斬使者焚詔書城上糧既盡令將校出粟雜牛皮麩藥以給之民有自食其子者猶力戰不屈戰于丁村軍潰阿木請于世祖赦焚詔斬使之罪令早歸款庭芝不納後大戰揚子橋姜才將回回引刀向張弘範弘範迎刺之流矢中才肩才拔矢揮刀而前元師辟易不敢逼

陳文龍特授中大夫同知樞密院事兼權參知

政事誥

勅祈永命開中興維哲輔同心之助詰戎兵揚大烈維  
世臣繼美之能永懷孝祖之聖謨緬想乾道之賢佐正  
色敢言之操知為忠臣贊元經遠之猷進貳宥府天毖  
我成功所予迪惟前人光茲復見於魁儒其適遵於陟  
典具官某識明而才裕學粹而器閎仁有勇德有言蹇  
蹇救時之志和不流中不倚恢恢穆綽之謀絲首諫以  
疇咨登中樞而共濟參翼天保采薇之治協圖蒸民常

武之勲慨四郊多壘之未清慄一日萬幾之孔棘若汎  
濤而求烝楫若支厦而萃良工趣躋淳化名臣之官峻  
陞元封執政之秩乃兼醴假用又多艱進爵侯圭增封  
邑采以隆股肱之睠以計社稷之安噫子房決勝而運  
籌盍益恢於長策召公是似而錫祉尚念紹於令名朕

方篤繩武之思爾克邁象賢之訓可

文龍本名子龍狀元唱名度宗賜是

名德祐元年後棄位遁去益王立漳州亂以文龍為宣撫使討之復知興化軍元兵至城下通判曹澄孫開門降執文龍欲降之文龍指其腹曰此皆節義文章也可相迫邪卒不屈械送杭州不食死

劉黻特起復授端明殿學士知慶元府沿海制  
置使誥

勅朕慨思時艱申飭外治陟禹迹至海表其克詰於戎  
兵命畢公釐東郊以謹固於封守睠論思之俊望懋牧  
御之殊庸賜齊履以重臨墨晉經而彊起具官某學茂  
而識裕志剛而氣和議論通古今動衆心介然塞諤之  
操文武有威風知大體展也經綸之才以常伯簡知於  
先朝惟連率著勲於鄞水黍苗之澤允洽甘棠之愛不

忘雖孝思極參騫之永懷而民望期霸伐之再至矧狼

心之匪茹嚴鯨沛之預防牖戶陰雨之備未修戈船下

瀨之師多缺人惟求舊戎有良翰弓鉞之錫額征趣為

朕往金革之事無辟難以家辭仁廟咨臣靖鎮桂林孝

祖詔臣介帥荆峴事維孔棘禮有從權是用躋峻職於

承明聳雄威於制閫即里門而眦印冀溟渤之澄波噫

精神彊本折衝既念移忠之義喉舌賦政於外益圖救

武之功勿遲其行式克用乂可

益王登位以蔽為參知  
政事赴台卒于羅浮



常楙特授端明殿學士提領戶部財用誥

勅八政食貨為先慨民生之寡遂九式制用有節念兵費之孔殷欲斟酌於源流必培護於根本淳化命總計之使建炎重提綱之權適遵舊章簡畀碩彥具官某縝密而粟從容以和善教得民有長者之風而不懦儒雅飭事有能吏之才而不苛屢底績於价藩旋騫華於禁路論思藹嚴徐之譽銓綜推裴馬之公惟錢穀之入幾何懍興師之弗給而公私之積可痛嗟足食之尤艱額

其任則可以通有無振其領則可以扼欺壺陟承明祕  
殿之峻治版部邦計之繁眦昔三司冠儀八座噫國以  
義為利朕方圖損上益下之規財者人之心爾勉行愛  
民厚俗之政惟正是義其永有辭可

按楸嘗援晉太子  
申生事欲為濟王

立後德祐二年拜參政宣麻慈  
元殿文班止六人繼而逃去

文天祥特授端明殿學士依舊江西安撫使制  
西江東制置使兼知平江府誥

勅元戎十乘先行式倚真儒之望師中三命承寵邁隆

方面之權朕若稽先朝之舊章最重承明之邃職內以  
待畿廷之彥外亦褒帥聞之賢王素之牧平涼程戡之  
涖益部皆膺茲選今得其人具官其實學濟時英猷緯  
國文有武備義槩質於神明儒知軍情忠忱貫乎霜日  
傳檄召兵而志士奮纓冠赴難而國勢張不負素定之  
猷允謂寡二之畧予欲復江表之疆宇命爾攘除予欲  
壯剡右之翰藩咨爾修扞威稜聳前茅之令醜類憺破  
竹之危惟任之專者位必崇惟名之重者功必集乃躋

班規殿之峻以增華帥闡之嚴噫邦咸喜戎有良翰茂對陟明之渥身在外乃心王室趣成敵愾之勲可

按德

祐初江上報急詔天下勤王天祥捧詔涕泣自贛入衛上書宜分天下為四鎮責任攻取者時議以為迂詔知平江府

翁合特授試尚書禮部侍郎誥

德祐元年

勅朕慨四維之未張念多艱之求濟為國天地與並必辨上下以定民典禮夙夜惟寅必進英雋以彊本乃睠索班之舊誕敷環召之榮具官某內美修能瑰意琦行

韶鳴玉潔淵哉實好斯文山立時行紛獨有此姱節羽  
儀侍從之列斧藻副誥之華駒皎皎以莫維鳳縹縹其  
高邈予未堪難疇咨百君子之謀爾有嘉猷申命小宗伯  
之職肅治軍之儀汝翼蕨越紉之祭汝明適成樽俎折  
衝之功匪曰籩豆司存之末相見何晚周五禮有待而  
行今急而求魯兩生豈不能致式克用義惠然來思可

按合闈人著古今絕唱嘗論賈似道以姤賢無比之林  
甫輒自託於伊周以不學无術之霍光敢效尤於莽操  
總權罔上責國名兵專利虐  
民滔天之罪乞遠投荒昧

高斯得依前行起居舍人特授兼侍讀誥

勅具官某朕聞學於古訓乃有獲詢茲黃髮則罔愆在天  
聖時臣奭以尚書勸講在元祐際臣維因寶訓進規延  
登者儒聿駿先烈爾履粹而養以直學醇而資之深惟  
考成人肯來覽德曰太史友命爾紀言睠聚辯居行之  
勤倚薰陶涵養之益何相見之晚也試垂聽而問焉百  
篇雅奧之文中興修攘之治示我顯行率惟敎功清閒  
之燕盡精思朕樂親於宿望溫潤之氣可開道爾念紹

於前修

新得蜀人嘗論似道之罪

文天祥特授集英殿修撰樞密都承旨依舊江  
西安撫副使誥

勅具官某多難維其棘矣有嘉衛上之忠來朝又何予  
之載錫在師之寵脂車趣駕進律敷恩爾才裕經綸器  
兼文武以臯伊冠倫之望有吾樂濟時之猷糾合義師  
欲以身任國家急感情憤外患不以賊遺君父憂分閭畀  
重弓之榮導音預前籌之畫朕方旰食而慮爾盍夜衣

而行知當纓冠投袂之時正如奉甕沃釜之急用躋華  
於書殿俾眠渥於從涂修戈矛與同仇亟其入覲運帷  
幄而決勝尚賴協謀可

天下勤王詔至天祥捧之涕泣發郡中豪傑有衆萬人遂入衛

其友止之天祥曰國家養育三百年一旦有急徵天下兵無一人一騎赴者吾欲以身殉之庶天下忠義將有聞風而起者義勝者謀立人衆者功濟則社稷可保也天祥平生自奉甚厚痛自抑損盡以家貲為軍費其言曰樂人之樂者憂人之憂食人之食者死人之事

李芾特授祕閣修撰樞密副都承旨依舊知潭  
州兼湖南安撫湖北鎮撫使誥



勅具官某十國為連有帥莫重於艱難之日諸侯有功  
進律莫先於守禦之勞爾忠義紹於儒先器能濟於世  
媿中立不倚姦邪所忌連蹇駒谷壯氣不衰宅牧星沙  
分閩鄉部護風寒奏月捷精神折衝使湘水無波嶽鎮  
不搖朕嘉乃勤儕延閣紬書之職貳宥廷導旨之聯文  
武二事兼之矣時幾孔棘狡謀匪茹惟事事備以清氛  
侵集救功用對揚我師中錫命之寵可

芾守潭州乘城  
死戰有招降者

斬殺以狗力不能支名帳下沈忠遺之金曰吾力竭分  
當死吾家人亦不可辱於俘取酒飲其家人盡醉乃徧

月之芾亦引頸受死忠縱火焚其居還家殺其妻子復至大所大慟自刎幕僚陳億孫顏應焱皆死潭民多舉家白盡城無虛井

縊林木者相望

謝枋得特授秘書省著作郎兼權司封郎誥

勅具官某春秋成而亂賊懼作執秩以正官用能一戰策勲朕崇獎氣節之士兼史職郎選而命之庶有厭難折衝之功爾以鯁直忤大姦義形於色為一鄉之望廣信控風寒要衝惟季梁在隨楚不敢謀忠信行乎州里隱然金湯之固是用進長承明兼組主爵凡搏力之法

扞城之備暨守臣共圖之既克有定謂爾來矣可

枋得嘗以

發策迂似道見斥及間沿江郡縣內附自以與呂師夔善乞朝廷使之行成又乞身至江州與呂文煥議事會文煥北行不及而反俾知信州呂師夔徇江東枋得迎戰敗績奔建寧山中世祖召至京師七日不食長書累萬言貽留夢炎稱大宋遺臣大元遺民食棗子七枚以死有文章軌範行世

姚訐特授帶行太府寺丞依舊知常州誥

勅具官某毗陵控風寒之衝淞河以西若防之制水特為屏翰北人侵軼亡謀壹大治之則可以固吾圉厭難折衝惟良二千石是賴爾以世居是邦即家剖符義槩

奮發且戰且守服勞維多外府轉丞示我陟明之典益

堅捍禦亟奏膚公朕將有懋賞可

按書希得子劉師勇後常州書知州事力

戰固守巴延命降人王子良役城外居人運土為壘併人以築之又殺民婦取其乳煎膏作砲焚其牌秘城破之

黃萬石依前資政殿學士特陞江西制置大使

兼江西轉運使誥

德祐元年

勅宣力四方汝為既眠恩於政路右師三錫承寵盍增重於閫權昔高廟之耆武功命臣綱而鎮江右宏開制

閻特畀大名祇率舊章誕敷褒律具官某經綸實學開  
濟遠猷吉甫文武憲邦才周應變孔明危難受任志切  
抃時纓冠往以扶王事之艱投袂起以赴鄉鄰之急四  
郊若防制水恃乃扞城六師以修我戎徯其衛社慨天  
塹濤波之沸慄風寒根本之憂率四方諸侯賁機衡之  
異渥謀中軍元帥峻弓鉞之顯征分陝之任益隆殄寇  
之勲可冀兼華漕節植屏洪都噫元戎先十乘之行朕  
欲壯中流之襟帶一賢制千里之難卿其恢外禦之規

募精神折衝則氣勢強指授當任則將士勵既克有定

遙圖爾庸可

萬石在江西不能禦敵阿爾哈雅取隆興萬石自撫州奔建昌降大元首制三劄為

士大夫之倡其將米立不降萬石諭之曰吾在宋官衙一圓牌寫不盡尚降汝至小何不降米立大罵嚙其舌以血唾其面就死萬石以大元軍入郟武文天祥開府南劄經畧江西遂復郟武萬石敗走

趙孟傳特授華文閣直學士沿海制置使知慶

元府誥

勅朕申儆豫防疇咨良牧師保世祚表海聿懷宗老之遺芳孝恭尹茲東郊迪簡廷臣之令望我有明命責於

价蕃具官某質厚而器閎心醇而忱裕以仁者勇協贊  
去凶之謀為同姓卿獨堅守節之志若昔理祖眷爾前  
人京兆懋彈壓之功司徒敷寬和之教繡游鄉國閫制  
滄溟迨今甘棠之餘思復見裳華之專媿尹神臯而曳  
履既振家聲即里社以分弓俾踐先職濟舜閭之邃直  
耀漢綬之榮觀軼兗州再世之光邁安陽奕葉之盛水  
犀之師爾其練習佩犢之民爾其鎮綏元帥說禮樂詩  
書无忝象賢之助州里行忠信篤敬遙觀報政之成可

元兵至明孟傳迎降以酒飲岱爾岱手震酒傾岱爾岱曰我豈非人耶何畏懼乃自引滿而飲之

家鉉翁依前直華文閣樞密副都承旨特授知  
臨安府浙西安撫使誥

勅具官某朕慨思時艱迪簡賢尹商邑為四方之極用  
謹固於本根周官倡九牧之風乃力辭於將從有嘉廉  
遜載錫寵褒爾粹學融明素履修潔和平之政如古循吏  
所稱清直之名惟前文人是似世濟其媿人皆曰賢肆  
予更政化之初命爾導宥密之命咨日畿浩穰之寄陟



地官論思之聯怡靜之操不渝忠讜之風可挹予欲成  
奠枕皇皇之績爾惟有游刃恢恢之才彊本折衝尤難  
於歐蔡承平之日流化自近匪但循趙張發擿之規可

鉉翁位執政巴延令程鵬飛取太后手詔諭州郡降附  
太后從之檄執政皆署鉉翁獨不從使者命縛之鉉翁  
曰中書無縛執政之理乃止後為祈請使國亡官之  
不從後至河間講易歸臨安以死有春秋傳行世

楊文仲特授集英殿修撰知漳州誥

勅朕選渤海賢良之守用又嘉師厭承明侍從之勞難  
違雅意睠漳浦价藩之重有臣熹善政之餘今得其人

乃試以政具官某魯諸儒之學周吉士之風擇乎中庸  
玉璣黃流之器好是正直朱弦清廟之音出奏民庸入  
儀禁路命時貳於起部職簡而清咨綰長於國庠士有  
所式方羣彥聚朝而共濟慨一賢補郡之獨先惟朕勉  
從俾爾謹牧越在外服曷思自業以流根式是南邦必  
圖厚下而立本勿謂閩土之遠亦若周畿之間佇聞政

聲世茂乃績可

文仲蜀人虞伯生外祖

呂大圭特授秘閣修撰知漳州誥

勅具官某朕擇選良吏而宅乃牧嘉老成人而遂其志  
體臣子民之仁一也爾學醇行粹為時宿儒訪予落止  
入說邇英有涵養薰陶之益司宗惟亞典制典選意新  
才壯何求退之果也漳浦价藩爾居相邇命爾懷二千  
石綏以蓬閣論譔闕其歸身處江湖之遠名在奎壁之躔  
詩云毋金玉爾音而有遐心可

大圭溫陵人嘗為中書  
舍人有春秋五論集傳

或問  
行世

文天祥依前權工部尚書都督府參贊軍事江

西安撫使特授湖西江東制置使兼知平江府

誥

勅謀元帥將中軍簡在說禮崇詩之彥分六卿倡九牧  
時維制治保邦之規朕疚懷艱危注意英雋有嘉衛社  
之志誕畀制閫之權具官某碩大而光明宏深而肅括  
武文兼備有經營四方之才忠義自將有獎率三軍之  
畧惟碩望冠龍甲之選蓋皇祖為燕翼之詔討亂畧以  
倣師人百其勇追殊遇而欲報朕知乃心咨胷中甲兵

之奇付閫外弓鉞之任若高皇命重臣宅牧合江淞以  
顓征若孝廟詔常伯奪情念邊疆之孔棘總中權於方  
面殿巨屏於吳門內以護日畿之本根外以復天塹之  
險阻規募有素勲業可期噫元戎十乘先行共武服而  
國定師中三錫承寵以衆正而民從適成却敵之功丕

闡用儒之效可

元兵破西安召天祥入衛天祥行平江無固志矣天祥拜右相至軍前慷慨不

屈巴延迫之與祈請使偕行至鎮江逃去浮海如温州起兵江西志圖恢復空坑大敗就執入元都不屈南望拜而死

陸秀夫特授淮東提刑兼淮東制置司參議官

誥

勅具官某古者兵刑一致猾夏姦宄皆士官所懲獻馘  
獻囚皆魯泮之事爾以通材敏識久參閫畫東淮祥刑  
使者缺命爾愛我嘉師察獄以情斯可一戰乘軺飛檄  
爾實兼之審讞洗寃籌邊決勝所以拯黎元之命者在

此往欽哉可

秀夫奉使巴延軍前求稱伯姪不從後以兵會二王海上位至宰相儼然正笏如平

時或在行中悽然泣下以朝衣拭淚盡濕凡述作皆出其手雖在匆遽猶日書大學章句勸講崖山既敗乃仗

紉驅其妻子曰而去怕我不來乃詣帝舟啟帝曰少帝太后已辱陛下不可再辱抱帝赴水死

咎萬壽特授復州團練使知嘉興府兼成都府

路安撫副使誥

咸淳七年

勅具官某率寧人有指疆土尤重嘉州謹侯度修爾戎  
兵其惟良將懋簡折衝之績誕敷進律之褒爾挺志忠  
純受才沈毅壯謀定金城之畧雄稜愔玉門之關統戍  
沔陽而威信孚宅牧瀘水而保障固肆疇咨於虢勇俾  
易鎮於犍為正秩戎團仍貳帥閫惟嚴於備禦則江流

靖惟勤於撫綏則民心安往奏膚公祇若明訓可

德祐元年

萬壽以嘉定及三龜九項紫雲城降於大元自後兩川郡縣皆送款獨張珏固守重慶不下

張起巖依前武功大夫復州團練使特陞除帶御器械知夔州兼夔路安撫副使誥

勅具官某朕睽蜀道以注懷屬夔門之謀帥救武功於西土迪簡安邊之良得猛士守四方邁求固圉之績爾謀老事壯知深勇沈宅牧捷為暨暨扞城之畧參華方面洸洸敵愾之忠疇咨折衝乃命改鎮肆頒進律之渥



明陟扈帶之聯其覽平沙八陣之圖以護長江萬里之險可

張世傑依前保康軍承宣使樞密副都承旨特授沿江制置副使知江陰軍兼淞西策應使誥

德祐元年

勅閩外制將軍必有重弓之備師中承天寵趣頒三命之榮朕植江表之藩籬圖浙河之屏翰乃授西討之畧以先元戎之行具官某志節忠純才猷明果帷幄決子

房之勝屢敵愾以獻功草木知萬福之名獨解紛而排  
難義槩倡勤王之勇雄稜壯禦侮之威憤妖壘之未平  
慮狡謀之匪茹丞緝電邁有捕鹿犄角之形虓旅颯馳  
有擊蛇首尾之勢洊騰月捷大振天聲予欲嚴守禦於  
澄江以捍蔽近甸予欲復疆理於京口以進取列城擢  
貳方面之權兼綰郡符之寄合漢將籌策之用建唐使  
應援之名運掉適宜士氣百倍竒正迭出妖祲一清豈  
止日畿之安庶幾天塹之定若昔臣俊受任中興天惟

誌我民朕念紹於前烈師以順為武爾亟奏於膚公可  
張世傑依前保康軍承宣使帶行樞密都承旨  
特授龍神衛四廂都指揮使誥

勅修甲兵與偕行既懋幹方之畧聽鼓鞀而思帥聿隆  
進建之褒具官某果毅而尚謀忠純而好義勵擊楫清  
中原之志首敵愾以獻功膺推轂遣將軍之權獨折衝  
而制勝壯槩為勤王之倡雄稜期殄寇之勲朕方赫濯  
威聲將攘除於戎醜爾惟獎率義旅庶清肅於江流載

考中興之名臣尤重廂部之陟典內以嚴鈞陳太微之  
衛外以澄金陵北固之氛噫定王國奏膚公式倚良翰  
之重在師中承天寵嗣放懋賞之榮可

張起巖特授寧遠軍承宣使龍神衛四廂都指  
揮使依舊知夔州兼夔路安撫副使誥

勅艱危之際恃節義為金城忠良之臣植封疆為砥柱  
孝寬之保玉壁真卿之守平原今見其人朕嘉乃績具  
官某秉心純實立志雄剛草木知萬福之名帷幄決子

房之勝愾楚氛之甚惡嘆蜀道之至難細柳堅壁之威  
鎮安夔路勁草疾風之操克復開江誅偽使而焚其書  
挫強敵而奪之氣奏封來上大節可嘉峻隋容管之承  
流班亞齊越密聯廂部之分衛職近周廬式昭褒賞之  
恩用為屏翰之勸噫當一面屬大事朕不忘固圉之勤  
獎三軍定中原爾益勵折衝之畧適收雋捷嗣對寵光  
可

許文德特授

闕

州觀察使依舊知淮安州淮東

安撫副使兼淮東策應副使誥

勅戒戎旅率淮浦邁成却敵之雋功承天寵在師中載  
錫策勲之懋賞有嘉凱獻用勸戎昭具官某識明而志  
忠謀老而氣壯愴雄稜於閩外如虎在山作重鎮於淮  
陰若羆當道賢於長城矣豈憂匈奴哉愾北寇之亂常  
挾叛臣而犯順狡焉驅十萬之衆闢如交四面之鋒維  
我屏翰之良悉心戰守之畧晝禦宵擊保固金湯之疆  
雷掃風除攘殄旃裘之衆大奏采薇之捷優獎前茅之

勞正使領於廉車聳軍容於方面既酬茂績益勵英猷  
念多壘之未清懍東陸之孔棘用師觀釁而動乘勝氣  
以盪平尅敵以滅為期趣勁兵而應援式克耆定尚有  
殊褒可

田謹賢特授親衛大夫福建觀察使依舊知恩  
州兼御前諸軍都統制誥

勅國家多難正遠臣敵愾之秋節義天閑嘉良牧效忠  
之志趣提師而入援爰進律以示褒具官某性行端純

器資果毅附衆威敵而兼文武如穰苴之善兵銜訓嗣  
事以考度程若弘正之濟美奕世守封疆之固一心堅  
忠孝之傳憤獫狁之肆凶率熊羆而奮勇朕方馳羽檄  
以召勤王之士爾乃飛驛書而勵報國之忱擊楫誓清  
纓冠往救平原為金城之倡恨未識真卿之賢河西布  
璽書之明爾用錫寶融之寵陟崇階於親衛躋峻秩於  
廉車汝捍我於艱其援桴鼓而進功多有厚賞以須賜

旄鉞之榮

田氏世襲思州與播州楊氏世姻  
宋亡入朝官榮祿大夫封義敏公



揚邦憲特授親衛大夫利州觀察使依舊知播  
州兼御前諸軍都統制誥

勅聽鼓鼙而思帥匡濟時艱修戈矛與同仇載嘉義  
爰趣援師之至誕揚褒律之榮具官某植志忠純秉心  
毅臨機料敵識明金版之六弋御衆牧人威憺玉關之  
萬里奕世固封疆之守一忱堅節義之閑憤蛇豕之肆  
凶合熊羆而奮勇朕每食不忘於鉅鹿爾惟志常馳於  
伊吾獎率勁兵捍衛多難真卿未識獨倡平原之盟竇

融來朝宜錫河西之詔恩加增秩擢名勤王陟親衛之  
崇階峻廉車之殊渥天助者順其戒戎乘之行師克在  
和則有齊鉞之命可

邦憲世襲播州十八世宋內附遂  
請降世祖下璽書撫諭授龍虎衛

上將軍侍衛親軍都指揮使播州  
安撫使子孫相繼襲爵寵錫尤厚

姜才依前右武大夫特授闕州防禦使依舊建

康府駐劄御前諸軍都統制誥

勅安邊境在良將久宣敵愾之勞共武服奏膚公式厚  
策勲之寵有嘉壯駉載錫褒章具官某票銳而好謀忱

恂而尚義隱若敵國差強人意率彼淮浦泱泱衛上之  
忠以修我戎暨暨冠軍之勇狡焉醜類梗我要衝逞蛇  
豕以薄城率熊羆而犯境郊多壘辱也獨被髮以纓冠  
鼓三軍進之乃雄心而鳴劍先鋒鏖戰入陣勦除亟建  
破竹之勲來獻采薇之捷威稜大振賞典趣放陟使領  
於捍防表戎昭之果毅有功見知則說用勸忠蓋之臣  
擊敵以滅為期尚賴屏藩之寄勉建殊績嗣有茂恩可

姜才在揚州屢捷益王登極李庭芝命朱渙守揚州而  
與姜才將兵七千趣秦州將東入海庭芝既行渙以城

降阿朮圍泰州驅庭芝妻子至陴下招降姜才發九疋不能戰泰州守將孫貴降庭芝與才俱就執至揚州才憤罵不已元帥不忍殺之朱渙曰揚自用兵以來積骸滿野皆庭芝與才所為不殺何俟乃皆殺之揚民莫不泣下由是淮東州郡皆降

陽立依前右武大夫特授闕州觀察使依舊知

涪州誥

勅聽鼓鼙思將臣欲濟艱危之會倣師徒討亂畧盍優獎擢之恩其錫明綸以旌壯槩具官某忠誼根於天性知畧習於邊籌砥柱蜀道之衝賢長城遠矣湯池涪川

之險曰將軍制之獨堅細柳之屯屢奏采薇之捷士氣  
大振敵膽為寒修兵與偕行久徯勤王之旅出車維其  
棘趣收克敵之勲宣力既多陟明可後武爵峻躋於左  
廣使名超進於廉車賞不踰時益作邊城之氣師直為  
壯遂清江介之氛亟成雋功嗣對褒律可

苗再成特授拱衛大夫依前和州防禦使帶御

器械知真州誥

德祐元年

勅王事多難維其棘師克在和戎武惟揚伐有辭功多

厚賞某鳴劍伊吾之壯志堅壁細柳之英標自守圍於  
儀真克執醜於江許率勁兵而勇往徑擣妖巢燬列柵  
以無餘連收雋捷忠忱足以振士氣義槩足以懾戎心  
賁褒律之殊榮晉橫班之峻秩用錫爾祉益殫拱扈之  
勤立定厥功嗣有寵褒之典可

伊實攻真州再成就庭  
芝節度日與之戰率趙

孟錦大戰於鶴背敗績後謀奪駕不克元既破揚州攻  
真益急趙孟錦失足墜水中死苗再成身生被獲不屈  
死而

陽立特授翊衛大夫依前闕州觀察使陞帶行

帶御器械知涪州誥

勅多難惟其棘緬思蜀道之艱十乘以先行式固涪江  
之守慨蛇豕食上國之慘恃熊羆不二心之賢趣戒勤  
王之師峻放進律之寵某官某雄姿果毅義槩魁閎撫  
鳴劍馳伊吾壯哉敵愾飭戎車伐獫狁偉矣折衝玉關  
憺其威名金城倚以屏翰輯寧五郡保障一方天降割  
於我家重以投鞭斷流之患心固不在王室挺然纓冠  
救鬪之懷遣將校而奏帛書涉險阻而承羽檄聞者興

起發於忠忱念江淮之巢窟未清而荆益之襟喉猶梗  
欲霆擊而電掃盍卯命而辰行是用升翊衛於橫班躋  
扈帶於邇列哀乃勁節亟其疾驅獎三軍攘姦山以報  
先帝辟四方徹疆土肇敏戎公投袂而來反席以俟可

劉師勇特授左武大夫依前濠州團練使帶御  
器械平江府駐劄御前諸軍都統制誥

勅戰功日多莫難乎先鋒之勝賞國之典莫高乎橫列  
之階我有勁臣特颺茂渥具官某倣儻扶義雄烈逸羣



總率戈船既振威於海道訓齊武旅爰養銳於毗陵趨  
潛師而進呂城欲乘勢而復京口中權後勁冒矢石以  
身先彼竭我盈誓旃表而膽落執訊獲醜敵愾獻功  
載嘉後亭橋之竒勲峻濟東山閣之華秩佇奏肅清之

捷嗣膺褒擢之恩可

師勇復常州大出舟師與孫虎臣  
張世傑戰焦山大敗歸常州城破

以八騎突圍走平江  
後率所部入於海

謝方叔特贈少師誥 咸淳八年

勅舊人不遠省甫放休復之恩一老不憚遺亟鑑餘忠

之奏聿懷耆彥載錫愍章具官某秉心純明制行果毅  
振直聲於言路迪簡先帝之知聳雅望於政塗遂登上  
相之任裕於進退介以壽臧致為臣而歸從容知止雖  
爾身在外注想詢猷念未踰衛武之年曷弗瘡平津之  
疾惟德爵齒昔所難兼若老成人今其餘幾九京不可  
作已亞師於以贈之噫就珍從以乞言嗟清規之已遠  
及生存而加綈慨榮命之不先禮貌具隆始終無愧可

按宋封贈制皆中書舍人執筆惟紹定六年史彌遠贈  
中書令追封衛王令學士院降制學士言非典故詔特

與降制是可以見  
當時法制之定矣

江萬里特贈太傅誥

德祐元年

勅多難維其棘方加壁以趣來一老不憚遺愴懷沙而  
永逝哀哉殄瘁聞者盡傷慨歎精忠時颺愍冊具官某  
文起八代之陋學貫六經之傳休休其心有容得宰相  
體蹇蹇匪躬之故先天下憂九齡罹偃月之誅諸梁深  
如歲之望若涉淵水求濟尚明保子猷詢黃髮固愆惟  
克邁訓聿懷勸講之助駭聞遺札之言冠至曷去諸弗

易子思之守人莫我知己寧從彭威之居凜一節之不  
渝雖百身其莫贖責以蘇軾之謚祿以謝安之官將興  
百世而立懦夫用張四維而厲臣節噫仁必有勇嗟予  
共納誨輔德之賢義重於生可以媿臨難苟免之士英  
魂未昧茂渥其歆可

江萬里特贈太師誥

勅君子式萬髮莫崇乎德齒之尊聖人有金城莫難乎  
節義之守嗟予大老逢此鞠凶用震悼於朕心肆表章

其芳烈具官某浩氣剛直德性高明孤忠自持屢墮林  
甫偃月之計特立不倚靡附賈充夕陽之姦盍歸乎來  
克邁乃訓若金用礪方咨汝說之賢懷瑾握瑜永慨靈  
均之恨御事罔或者壽昊天不弔愁遺哀哉殲良潛焉  
出涕彼誤國不死適以遺臭萬年維殺身成仁凜乎生  
氣千載禔師垣之極品賁哀斂之殊榮噫三公惟其人  
悵失扶顛持危之助九原如可作尚興廉頑立懦之風

可初萬里聞襄樊破鑿池芝山後園名曰止水及兵將  
至隱草野間為游騎所執大詬欲自殺既而逃歸城

金史卷之五  
老五  
破謂門人陳偉器曰大勢不可為某雖不在位當與國為  
存亡既而軍士執其弟萬頃索金銀不得支解之萬里  
遂赴止水死左右及子鎬相繼投沼中積尸  
如壘異日萬里尸獨浮出水上從者斂葬之

### 印應雷特贈端明殿學士誥

勅賜弓鉞以顯征夙懋幹方之績聽鼓鼙而思帥載放  
追命之褒其敷言綸用勸臣節具官某宏材任重實學  
濟時知仁勇之修身文武為憲剛大直之養氣精神折  
戒我師以鋪淮瀆雖在外而心王室有嚴有翼制勝尊  
俎之間惟築惟征守圉金湯之固月捷方奏星隕遽聞

愴名樹之餘思想羊碑之下泣彼忌功而沮善茲更化  
以懷賢念國步多艱朕安得頗牧而用若承明邃職爾  
未膺光鎮之榮植錫寵於密章俾耽恩於政路九原可  
作千載如生噫劉毅不為三公每深撫几之歎許穆加  
贈二等尚歆袞袞之華獎其忠勞聞者興起可

唐震特贈華文閣待制誥

勅事君能致身封疆之寄為重自古皆有死忠義之名  
長存朕慨國步之斯頻嗟臣節之未厲載嘉砥柱之操

三歎磬聲之思具官某剛毅近仁質直好義河北諸郡  
獨有真卿睢陽一城莫救許遠孤壘危於朝露勁氣貫  
乎秋霜壯矣結髮白刃可蹈也哀哉握節犀軒三椽之  
乃次對於松階俾廟食於藥社錫以令謚錄其遺孤

闕

若中興之褒唐重九京可作尚百世以祀番

君諒爾英魂歆我愍典可

巴延兵順流而東唐震度兵力不支死於州治之玉芝堂

通判萬道  
同以城降

汪立信特贈正奉大夫誥



勅名臣文武亦盡亦大惟艱良士膂力既愆不印自卹  
駭聞遺禮愍錫祿章具官某謀猷川行知畧輻湊賢長  
城遠矣才兼牧御之能曰聞外制之身佩翰蕃之寄慨  
懷危難倚任攘除擊楫之志未醕聽輦之思何及納書

裘邑躋三品之崇階鳴劍伊吾想九原之生氣可

立信以二

策上賈似道言不從請備銜壁與櫬之禮似道罵曰瞎  
賊狂言敢爾及蕪湖出師相遇似道撫立信背曰不用  
公言至此立信曰瞎賊更說一句不得今江南無一片  
乾淨地某去尋趙家地上死也置酒召僚屬手自為衣  
起居三宮與從子書屬以家事絕吮而死巴  
延聞之曰宋有是人使果用之我安得至此

趙與禔特贈朝請郎直華文閣誥

知寧國縣

勅具官某王事多難孰非全軀避禍患之臣宗子維城  
獨效捍敵死封疆之節聽磬聲而愾歎錫綸命以寵褒  
爾振振周公族之英蹇蹇楚同姓之操志堅即墨之守  
躬蹈井督之危方免胄以衛民竟結纓而殉義傷哉賢  
令罹此鞠凶增十秩以追榮嗟百身之莫贖仍躋延閣  
並錄孤兒俾廟食以旌忠尚毅魂之尅敵可

德祐元年  
大元取寧

國縣知縣趙  
與禔死之

王栢特贈承事郎誥

勅某朕惟正學不明士習頽靡人心陷溺稔成艱危是  
用崇獎宿儒使聞風興起爾祖為淳熙名流爾家世其  
學文獻淵源博以諸老之琢磨養粹得深卷道不試從  
臣有請追賁京秩當孔棘之時所以張四維扶世教也

詔於幽扁服享殊渥可

栢大父師愈受學楊時父瀚世  
游朱呂之門栢少號長嘯年三

十始知家學之源以長嘯非持敬之道更號魯齋聞何  
基從黃幹得朱熹之傳遂往從之律身以敬治家以嚴  
當暑閉閣靜坐子弟  
白事非衣冠不見也

孫虎臣特贈太尉誥

勅國家多難慨無死封疆之臣節義大閑是為衛社稷之本嗟忠臣之玉折錫愍冊以袞褒具官某英槩雄深壯懷卓犖威謀制勝蚤奏縛青宜結之功歟勇冠軍常有封狼居胥之志敵方投鞭而闕我意欲折箠而答之江湯湯武洸洸屬以討叛之任陣堂堂旗正正誓以盡敵為期乃俾守符乃授齋鉞關公待卒伍之善尚忍負之田布報君父之忠惟有死耳義重熊掌身輕鴻毛旃

裘聞之寒心營壘莫不流涕朕撫几以歎聽輦而思駭  
聞遺札之言愴失名將之雋密印紫綬追封尉府之崇  
直蓋犀軒納書廡祿之飾哀百身之莫贈慄千載之如  
生噫存弗居絳侯勃之官歿尚享段秀實之贈諒而毅  
魄欽我恤章可

元兵入秦州虎臣自殺虎臣嘗以數  
騎生縛布哈太子留以為質後殺之

夏松特贈保康軍節度使誥

勅事君能致身封疆之臣尤重自古皆有死忠義之譽  
長存聿懷磬聲之思載錫廡祿之典具官某威名濟於

世嫩兵畧得於家傳裕父功惟我有臣如李愬之在唐  
室若內舉皆堪為將如曹韋之在本朝慨敵馬之飲江  
統師干而揮寇擐旗者數矣勇不顧身纓冠而救之志  
於狗國嗟將星之遽殞慄義氣之如生授齊鉞以飭爾  
忠賜令謚以褒爾節噫加等而葬許穆重惻我心登壇  
而拜淮陰莫追既往英魂未沒茂渥其歆可

松夏貴子  
力戰被殺

議者謂松若在貴  
未必敗亦未必降

尹玉特贈濠州團練使麻士龍特贈高州刺史誥

勅具官某見危授命者義之先致果殺敵者忠之大通  
者熊羆之士進援毗陵鼓三軍倡勇敢爾玉以贛水之  
師爾士龍以淮瀆之旅擢鋒力戰隕於行陣而敵人之  
殄殲甚衆爾身雖沒可以愧怯懦退却者是用贈玉戎  
團之秩贈士龍刺史之綬英魂如生尚克厲此賊而剪  
滅之仍錄羽林之孤俾忠義之臣咸勸可

二將戰常州  
玉戰五牧士

龍戰虞  
橋皆死

資政殿大學士兩浙鎮撫使謝堂該明堂恩封贈

曾祖深甫特贈太師進封魯王誥

勅肆祀有來雖雖哀對宗祈之嘏秉德其鄰翼翼肅將  
使範之恭維賢相之流光施曾孫之濟美式敷餽澤申  
賁密章具官某故曾祖某德載鼎彝功高廊廟鄧太傅  
佐中天之業實鍾長樂之祥郭汾陽著貫日之功丕衍  
具慶之祉袞綉焜煌於三葉旌繁炳耀於六符助我明  
禋錫以多祐師垣王社人爵之貴可加贈策絲言祖烈  
之傳無斁可

深甫相  
寧宗



祖渠伯特贈太師追封魏王誥

勅多士對越在天咨政塗而相祀烈祖有秩斯祐懷世德以敷恩眷言棠笏之傳追賁松楸之享景官某祖父裳華文獻喬木聲猷高密之仁至訓而報益大汾陽之烈在曖而慶彌長維思齊之功有開必先維立政之輔垂憲乃後約軋錯衡之來假和鈴條革之有光告於文人仍繼師真王之秩介以繁祉繇重珪累衮之休可

父奕昌特贈太師追封魏王誥

勅我將式文王之典資時使領之賢崧高褒申伯之功  
溥予祭餼之惠惟宗祀以教孝用篤親而興仁具官某  
故父某大盈若冲盛德而闕裳華有章矣尚長君退讓  
之風緇衣之宜兮遵鄧侯法度之教象賢聯輝於政路  
駿奔陪祀於合宮嘉乃義方錫之愍冊更康叔國仍異  
姓王之榮胙畢萬封衍後嗣人之慶可

母吳氏特贈齊魏國夫人誥

勅崧高維翰之功推本生賢之慶召南積行之美端繇

正始之風朕命賢戚而鎮京師秩禋祀而敷餼澤異數  
密聯於政路徽章申賁於母儀具官某故母某氏文獻  
名臣之家柔嘉女士之德禮共縈治屏流水游龍之華  
教淑芝庭衍襲紫傳龜之祉蟬聯萬石之賚鴻漸兩社  
之班綏輯王畿凝皇皇奠枕之績肅祇使領儼峨峨奉  
璋之容睠義訓以有原諒孝思之追遠錦囊象軸大國  
兼齊魏之封翟第魚軒千載垂陶孟之範告之禰廟銘  
之鼎彛可

知樞密院事兼參知政事李廷芝妻徐氏特封  
楚國夫人誥

勅朕稱宗祀邁求救功常武之修我戎式倚籌帷之彥  
殷雷之勸以義載嘉壺範之賢其錫綸言用敷餽惠具  
官某妻某氏迪內則之訓藹女士之芳鵲巢夫人起家  
助召南分陝之化燕喜令妻受祉集魯邦膺狄之勲采  
薇之捷既聞彤管之褒可後宜其家而有譽貴於室以  
特封程第魚軒賜沐浯溪之國鸞書象軸增光袞路之

榮可

隆興府靖安縣管下利澤昭應普安王特封利  
澤昭應普安清祐王誥

勅古之烈士精忠貫乎日星沒為明神靈光射乎牛斗  
維三閭之姱節懍千載其信芳於民有功以德詔爵某  
神清白死直博塞好修仍羽人於丹丘已曾舉太初之  
表冠切雲之竒服猶不忘南國之思惠綏黎元銷禦菑  
沴肆丕從於衆籲式敷賁於號榮蕙茅兮吉占其歆兩

美蘭鞠兮終古以續九歌可

荆門軍玉泉寺義勇武安英濟王特封忠壯義  
勇武安英烈王誥

勅頗牧為將豈憂匈奴每懷雄俊廉蔣雖死常有生氣  
未昧英靈載錫之光亦克用勸某神才高三傑勇敢萬人  
蓋嘗乘漢水之溢而攻樊幾於震曹瞞之姦而徒許功  
雖靡竟志則不磨其餘威猶足寒戎心非更封何以慰  
荆旅用旌忠臣之節丕顯烈士之風二名孔嘉永賁傳

芭之詞楚九京可作尚能結草以抗秦可

咸淳三年十一月臣應麟以起居舍人兼權書行吏  
右禮工房七年七月自徽州召為秘書監兼權十月  
供職書行吏右禮刑房十一月除起居郎兼仍舊八  
年七月書行吏左戶房德祐元年三月真除舍人四  
月供職書行吏左戶兵刑房七月除禮部侍郎兼權  
書行吏右十一月除禮部尚書兼給事中辭西省  
兼組凡三八掖垣徧行上下房辭命臣應麟謹識

記曰王言如絲其出如綸然則誥命之體其可不慎乎文章至宋季風頽波靡矣而王言終不失體南渡以來龍溪汪公平園周公號為冠冕若厚齋王公尤所謂傑然者也咸淳德祐間社稷傾危近在朝夕而公四入中書遍行諸房詞命方除目填委他舍人閣筆不下公獨從容授之若行雲流水悠然泛然而莫知紀極者今讀其辭蓋會集羣言而以己意發之信所謂博極羣書者也昔三槐王公序南豐文集以大



手筆目之且謂名與天壤相契嗚呼豈獨南豐也哉  
後學滎陽生鄭真再拜謹識

故觀文殿學士正奉大夫墓誌銘

詩書所稱世臣之美盛矣惟宋豐芑涵育之仁逾三百  
年父子為相者三家鄭史氏與焉燕及後昆第祿昌衍  
益世德之積也厚而承德用譽亦在其子孫故觀文殿  
學士正奉公其淳德有常者歟越在內服靖共厥位越  
在外服惠政施於民涉世變守素履耄耄弗更其操近

古所謂吉人長者公既葬前進士黃君翔龍纂次行事

予嘉卿等請著石章應麟嘗執事太史竊觀先朝盛際

上以禮義遇其臣下以忠厚世其家法宜書瞻彼喬木

歸然故國纂乃祖乃考銘于彝鼎其可使遺老無傳

茲後死者之責不敢辭公諱闕之字子發世為明之鄞

人高大父詔以八行舉于鄉贈太師越國公曾大父師

仲贈太師越國公大父浩相宋孝宗為太師保寧軍節

度使封越王謚忠定侑饗廟廷父彌遠相寧宗理宗為

太師保寧昭信軍節度使封衛王謚忠獻母潘氏齊魯  
國夫人公忠獻季子也粹溫端愍忠獻以福艾期之謂  
它日亢吾宗初命承事郎紹定五年中吏部銓自寶章  
閣至右文殿修撰奉佑神祠除將作少監賜同進士出  
身遷樞密副都承旨忠獻薨服闋除司農太府少卿集  
英殿修撰仍畀佑神祠即家授沿海制置司參議官進  
寶章閣待制賜金帶陞華文閣知處嚴溫三州皆力辭  
理宗睠受遺定策之勛曰篤不忘公兄忠清公宅之既

踐敷中外入式樞機公怡默自將澹於榮進上欲試之  
治民迺以敷文閣待制守婺時淳祐八年也婺比歲旱  
飢出索裝糴湖右米三萬石往賑貸民罔弗濟易守處  
州始至獄多淹繫閱實上部使者讞決圜扉一清賦稅  
三年民苦不支公倚閣其一年版部期會苛迫以已俸  
代民輸未幾督趣如故公以累年之逋一朝求足民必  
重困奏以三十年最高者為數疲氓感悅忠清之喪以  
在原急難謁告奔赴得請遂行老幼遮道攀留召為兵

部侍郎辭不拜進待制寶文閣提舉祐神觀擢工部侍郎權尚書願就散秩陟寶章閣學士提舉萬壽觀奉朝請寶祐二年召為兵部尚書以煥章閣學士知紹興府浙東安撫使惟祖惟兄遺愛在越公來鎮棠陰耆老驩迎念紹先慙壹以寬和撫柔此民初忠定作牧叛義田為士大夫賢而貧者喪嫁之助歲久實惠不霑至是扼弊櫛蠹始復舊規越為南陽鄉公寬而有制無所回撓郡大閱一夫徑造聽事乃卒伍怙王邸勢者公曰犯階

級有常刑執而黥流之軍民熱服咸曰仁者之勇甫暮  
治最轉聞璽書褒美陞徽猷閣學士甫任尋除工部尚  
書五年進權兵部兼工部宗祀明堂為橋道頓遞使禮  
成拜端明殿學士時昇執政思數懇避甫至斷章批禽  
曰卿繼忠孝謹牧養予維寵嘉之祖孫父子昆弟先後  
列政余惟呂氏暨卿門式克欽承以為邦家光景定二  
年進資政殿大學士知建寧府承葉公夢鼎陳公昉之  
後廉明勤儉遵其成規南方多嵐霧日高乃視事公常

夙興見吏民不以素貴少懈夏潦崇安松谿水泛溢民  
懲壬子苗扼攜杖入郛公盛服露禱為民請命移時澍  
霽橋梁安焉幾墜民凜凜沈墊亟募舟楫拯之有阻渡  
剽攘者罰无貸黎明水退民以更生胥慶建俗祀鬼惡  
少身殉淫祠愚眊神事之公捕為首者正其罪谿流湍  
悍競渡鬪爭多覆溺嚴為科禁俗遂革閱歲再召進觀  
文殿學士提舉萬壽觀奉朝請居生母齊韓國夫人林  
氏憂哀毀過禮咸淳二年終制以舊職知寧國府郡上

供米隸淮東西兩餉俾其屬受委輸淮西使者治建康地近關尤峻或轉餽江北跋涉耗失綱欠數十萬計而郡官兵餼廩常不給公控籲于朝始得額隸淮東郡以稍紓明年祈閔提舉洞霄宮優游里第垂十載自是閔光歿華若未始有軒冕晚歲闔門養疾一榻蕭然人希識其面至元三十年病革卻藥遂不起春二月十三日也年七十有九階自初命至正奉大夫爵自鄞縣開國至奉化郡公食邑四千六百實封戶六百娶洪氏娶高



平郡主趙氏皆先卒子男五吉卿承議郎文府寺丞知武岡軍先一年卒沂卿承事郎為兄待制後嘉卿彭卿並承事郎韋卿女子六孫男六辰孫觀孫景孫慶孫增孫滿孫女四曾孫男一公頤女二是年四月丁酉葬于鄆縣陽堂鄉金輿與高平合兆公性孝友敬保先緒躬躬如弗勝諷訓言罔敢墜忠獻冢木已拱隧碑未立論撰先德屬吳公淵狀其行進徹乙覽理宗用至道熙寧銘兩忠獻故事親製文題其顏曰公忠翊運定策元勳

之碑奎藻漢章賁耀松檟孝子揚父之美公有焉別墅  
在錢塘西湖密邇枋臣私第欲得之怵以榮利公以先  
人舊業終不與姊適故戶部侍郎趙公汝楫蚤卒寔奉  
化隣山有訟公割田易之爭者遂息樂善不倦故家流  
風猶存名譽以謙亦允蹈之處鄉黨恂恂似不能言與  
人交臧否不出諸口而胸中有涇渭自奉菲薄服用如  
懼儒治五郡護本根緩繭絲雖無赫赫名一念愛民隱  
然膏澤之潤令終壽考集享備福克對前人光於戲賢

哉銘曰

史以官氏相肇于唐迨宋昌大台鼎相望有若甘盤有  
若伊陟奕葉鈞衡太常紀績象賢惟公昨乃舊勛用彰  
厥善不專為恩佩玉徐趨翔于常伯處貴無驕在豐能  
約迪遇眷知職聯輔臣素有世舊豈伊異人公拜稽首  
對揚明命紹聞衣言秉心無競始政於婺終政於宣振  
乏平賦民瘼以蠲禹會介蕃維祖賜履憩棠勿剪二季  
涖止愛民厚俗漢吏之循安靜悃悞善不近名岩居川

觀殊庭燕佚仁者之壽秀眉華髮時行則止脫屣浮雲  
一其初終駒駸鴻冥嗣守惟艱前修所歎允矣君子歸  
飛無憾曰晉遺老曰殷故家胡不百年鄉關之嗟古碣  
蒼蒼眎此銘誄忠定之孫忠獻之子

史鄂州墓誌銘

鄂州君史育之字子報贈少師彌鞏公之子補國學生  
以父任知婺州該遇明堂恩補通仕郎銓中授從事郎  
峽州遠安縣尉仕至添差通判太平州改通州鄂州轉

朝散郎卒于官居官庶所至有遺愛乾淳初余始第進士侍先君于吏部倅婺明年少師公來守郡若侍馬兩家子弟相好也君二季皆余同年交老矣懷舊重有感馬銘曰

一邑之政天下式澗瀝有訓為世則君才恢恢優治劇佩玉長裾進匪棘井漆不食心靡惻殖豐履歛志弗詘巖邑嘉庸得自擊我銘表善貽千億

越大夫贊

智哉大夫鵬舉海瀕淵謨石畫為越良臣處女脫兔神  
機翕張澡會稽恥于禹有光吁嗟烏喙殲良忘功室既  
顛薨梓匠弗庸彼脂韋者自詭明哲謂不如螽謀身之  
拙二子謀國匪曰為身論士賢愚不以死生出者難將  
處者易持卓矣黃公岩居茹芝犧樽溝中木雁兩失鄞  
水泱泱我思奇傑

悼袁進士鏞詩

大柱不可折柱折勢莫撐九鼎不可覆鼎覆人莫扛袁

公烈丈夫獨立東南方欲以一己力代國相頡頏適遭  
宋祚移恥為不義戕奮然抗志起誓欲掃撓槍拔劍定  
前麾手回日月光賊勢愈猖獗山摧失忠良嗚呼絕倫  
志不得騁才長妻孥悉從溺枯骨誰克襄忠烈動天地  
游魂為國殤山水倍堪悲抱恨徹穹蒼穹蒼率一息庶  
幾紀星霜西風白楊路哀猿號崇岡解劍挂墓柏泣下  
沾衣裳惜哉時不利抽毫述悲傷

四明文獻集卷五



王深寧文集跋

王厚齋先生博學鴻才偉論卓識見諸立朝居官疏議  
彪炳史冊少從師授得呂成公真文忠之傳所著書凡  
六百八十九卷古今撰述之盛前無如葛稚川其次即  
先生稱極富矣通行天下者祇玉海困學紀聞詩地理  
攷紺珠詞學等書至手著序記表誥辭命誌銘之類闕  
焉未傳誠為憾事歲癸未余屏跡家門友人劉君讓以  
鈔書見售閱之乃四明文獻也採輯者乃滎陽外史鄭

公真也曷勝狂喜不惜重貲以應寒士之請把讀終卷  
間有未經詳明者僭為補綴有它處散見者僭為增益  
以成全集庶使文獻有徵不致瑰竒泯沒第愧弗能付  
諸剞劂以廣其傳姑繕寫龍龕藏俟之來哲云爾同郡後  
學前柱下史陳朝輔變五父謹識於雲在樓

謹案第五頁後三行伊實舊作阿未今改後倣此  
十四頁後二行阿爾哈雅舊作阿里海牙今  
改 十五頁後一行岱爾岱舊作斛爾歹今改  
後倣此 三十四頁前五行布哈舊作不花今  
改





總校官候補中書臣吳紹潔

校對官待詔臣胡士震

騰錄監生臣金振